

Gì da tractar pli blers cas

Instanza da recurs radio/televisiun 2015

■ (anr/gc) A l'Instanza da recurs independenta da radio e televisiun (UBI) è vegnidas inoltradas l'onn passà 26 reclamaziuns. 23 è vegnidas liquidadas en quest interval e trais han gì violà la concessiun. S'enter ch'il cussegl federal ha prendì enconuschientscha vegn il rapport da gestiun da l'instanza publictà. Quel è era cumparì en rumantsch. L'onn 2015 èn 26 novs recurs vegnids inoltrads cunter emissius da radio e televisiun d'emetturs svizzers – sis dapli che l'onn precedent. Ils posts da mediaziun – subordinads a l'instanza – han gì da tractar en il medem temp 237 reclamaziuns. 11% da quellas èn alur idas tar l'instanza. Ils posts da mediaziun – ch'intermedieschan tranter il public ed ils realisaders da programs – èn da gronda impurtanza pertutgant la surveglianza dals programs da radio/televisiun.

Ils pli blers recurs – cunter emissius dad SSR

Ils 26 recurs novs èn sa drizzads – cun ina excepziun (Radio Top) – cunter emissius da programs da la SSR/SRG. Reclamà è vegnì cunter contribuziuns da la Televisiun SRF (9), Radio SRF (7), Televisiun RTS (5) sco era mintgamai en in cas cunter Radio RTS, Televisiun RSI, Radio RSI e Radio Top. In recurs ha pertutgà tant in'emissiu da radio sco da televisiun. I croda si ch'in relativ grond dumber d'emissius da radio crititgadas derivan da la Svizra francofona.

Las reclamaziuns pertutgan 19 diversas sorts d'emissius. Ellas concernan per gronda part contribuziuns da politica ed autras sco magazins da politica, consuments, economia, cultura, scienza e forums da discussiun. Era cunter duas con-

tribuziuns satiricas da radio è vegnì recurri. Questas emissius han tractà temas divers sco l'iniziativa da la taglia d'ierta, la politica agrara, l'agid social, charrar en furia, tgira da vegls, midada dal clima, il salun d'automobils a Geneva, Pasca, in roman ed ils conflicts en Siria e Gaza.

Constatà trais violaziuns

Tar trais proceduras ha l'instanza da recurs constatà ina violaziun da la concessiun, pia ch'ellas n'èn betg stadas objectivas. Sancziunà ha l'instanza recurs cunter duas contribuziuns da Radio SRF. L'emissiu da novitads «HeuteMorgen» ha dà in'impresiun fallada davart las raschuns per las qualas ina interpresa ha bandunà la Svizra. En il rom da la contribuziun pertutgant in'interpresa da telemarketing ha il magazin da consuments «Espresso» na cumpilà objectivamain in discours da vendita. Era sco na objectiva ha l'instanza taxà ina contribuziun dal magazin da consuments «Kassensturz» dad SRF davart «Tschavattadas da dentists» (Zahnarzt pfusch), essend che fatgs impurtants n'èn betgs vegnids menziunads.

L'instanza da recurs – ina cumissiun extraparlamentara

L'instanza da recurs è ina cumissiun extraparlamentara da la confederaziun. Ella consista da nov commembers en uffizi accessori e vegn presidiada dapi 2016 per l'emprima giada d'in Rumantsch, numadamain da *Vincent Augustin*. L'instanza ha da constatar – a basa da recurs – sche bain realisaders da radio e televisiun han violà cun il cuntegn d'emissius il cumond dad objectivitat, multifariadad, protecziun da la giuventetgna, dretg fundamental u refusà illegalmain l'access al program.

Las decisius da l'instanza pon vegnir contestadas tar il tribunal federal. Las tractativas da l'instanza èn da princip publicas e gratuitas per ils recurrents.



Sisur: Ils nov commembers da l'instanza en la nova cumposiziun; giusut: Ils trais commembers extrads pervi da limitaziun dal temp d'uffizi.

MAD